



20 APR, 2024

Kawalan di sempadan Kelantan, Thailand disifatkan masih longgar

Berita Harian, Malaysia



Page 1 of 2

Kawalan di sempadan Kelantan, Thailand disifatkan masih longgar

Tiada pemeriksaan menyeluruh memudahkan kegiatan penyeludupan, termasuk senjata api

Oleh Nor Fazlina Abdul Rahim
nfazlina@nstp.com.my

Rantau Panjang: Kawalan sempadan di antara Kelantan-Thailand disifatkan masih longgar sehingga menyumbang kepada kegiatan penyeludupan, termasuk senjata api.

Kawalan itu bukan saja membabitkan pangkalan haram di Sungai Golok, sebaliknya laluan menerusi Kompleks Imigresen, Kastam, Kuarantin dan Keselamatan (ICQS) juga sama apabila tiada pemeriksaan menyeluruh dilakukan.

Pakar Undang-Undang Maritim Antarabangsa, Universiti Sains Islam Malaysia (USIM), Prof Madya Dr Mohd Hazmi Mohd Rusli, tidak menolak kemungkinan terdapat isu rasuah dalam kalangan petugas di kawasan sempadan menyebabkan kegiatan penyeludupan terus berlaku.

“Sehubungan itu, pihak berkuasa membabitkan kedua-dua negara perlu mengambil tindakan tegas bagi mengelak perkara sama tidak berulang.

“Sempadan Kelantan-Thailand

Eksklusif

hanya dipisahkan dengan Sungai Golok yang jaraknya sangat dekat di antara kedua-dua negara, malah pada musim kemarau orang ramai hanya berjalan kaki menyeberangi keluar masuk dua negara, sekali gus memudahkan aktiviti penyeludupan termasuk senjata api dilakukan.

“Saya yang berpengalaman keluar masuk di semua pintu sempadan darat mendapati kawalan dilakukan tidak menyeluruh, jauh jika dibandingkan dengan pintu masuk di Woodlands, Singapura yang lebih ketat,” katanya kepada BH.


Ambil langkah proaktif

Katanya, pasukan keselamatan negara terutama Jabatan Imigresen dan Jabatan Kastam Diraja Malaysia (JKDM) perlu mengambil langkah proaktif bagi menangani perkara ini.

“Mereka (pasukan keselamatan) perlu belajar dari negara lain yang memiliki prosedur lebih ketat, sebenarnya pasukan keselamatan kita sudah jalankan tugas, namun penyeludup lebih licik dan tahu

bagaimana mahu mengaburi mata pihak berkuasa dengan menyembunyikan barang seludup.

“Pada masa sama, kerajaan perlu melabur untuk memasti-



Anggota keselamatan memantau kawasan sempadan Kelantan-Thailand. (Gambar kecil dron digunakan bagi memudahkan kerja pemantauan penyeludupan. (Foto Nik Abdullah Nik Omar/BH)

kan sempadan Malaysia-Thailand di Kelantan atau di mana-mana dapat dijaga dengan baik sekali gus memastikan kegiatan penyeludupan tidak berlaku dengan mudah,” katanya.

BH sebelum ini melaporkan, seorang rakyat Malaysia dari Kelantan hanya mengambil tempoh satu jam untuk ke Golok, Thailand untuk membeli sepucuk pistol.

Lelaki berusia 50-an itu turut mendakwa ke Thailand secara sendirian tanpa dibantu mana-mana pihak dan masuk ke negara jiran melalui pangkalan haram di Sungai Golok.

Dakwanya, setibanya di negara itu dia dibawa oleh penunggang motosikal tambang ke lokasi pembelian senjata api, sebelum kembali semula ke Kelantan.



Anggota Pasukan Gerakan Am membuat rondaan meninjau pangkalan haram sempadan Malaysia-Thailand di Sungai Golok.



20 APR, 2024

Kawalan di sempadan Kelantan, Thailand disifatkan masih longgar

Berita Harian, Malaysia



Page 2 of 2

SUMMARIES

Tiada pemeriksaan menyeluruh memudahkan kegiatan penyeludupan, termasuk senjata api

Rantau Panjang: Kawalan sempadan di antara Kelantan-Thailand disifatkan masih longgar sehingga menyumbang kepada kegiatan penyeludupan, termasuk senjata api. Kawalan itu bukan saja membabitkan pangkalan haram di Sungai Golok, sebaliknya laluan menerusi Kompleks Imigresen, Kastam, Kuarantin dan Keselamatan (ICQS) juga sama apabila tiada pemeriksaan menyeluruh dilakukan.